



ATASSUT

UKA 2015/65/90

Steen Lyngø

04.11.2015.

**Illersornissamut isumaqatigiissutip 1951-imeersup kingornagullu ilassuteqartinneqartup qanoq isumaqatigiinniutigeqqinneqarsinnaaneranut kaammattuutunik saqqummiussisussamik Kalaallit/danskit allaffissornikkut ataatsimiititaliaannik pilersitsinissaq siunertaralugu danskit naalakkersuisuinut saaffigineqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut, taamaalilluni illersornissamut isumaqatigiissutit aammalu amerikamiut Kalaallit Nunaanni sakkutooqarnerat Kalaallit Nunaannut iluaqutaanerusinnaaqqullugit.**

**(Inatsisartunut ilaasortaq Hans Enoksen, Partii Naleraq)**

**Illersornissamut isumaqatigiissut 1951-meersoq tamassumalu kingorna tapiliussatut isumaqatigiissutit tassunga attuumasut nalilersuinermit Inatsisartunut (imaluunniit tatigeqatigiinneq pillugu isertuussineq pisariaqassappat Nunanut Allanut Sillimaniarnermullu Ataatsimiititaliamut) UKA2016-imi saqqummiussinissaannik Naalakkersuisut peqquneqarnissaannik Inatsisartut aalajangiiffigisassatut siunnersuut. Naliliinermit isumaqatigiissummi naalakkersuinikkut aningaasaqarnikkullu akuusut nunatsinnut qanoq pingaaruteqarneri nalilersorneqassapput, tamassumalu saniatigut Naalagaaffeqatigiinnerup iluani Namminersorlutik Oqartussat isumaqatigiissut malillugu pisinnaatitaaffiisa piginnaaneqarnerisalu erseqqissarneqarneri ilaatinneqassallutik.**

**(Inatsisartunut ilaasortaq Sara Olsvig, Inuit Ataqtigiit)**

ATASSUT siunnersuuteqartunut qujarusuppoq, siunnersuutinullu soqutiginarluinnartunut imaattunik oqaaseqaateqalaassaagut, tapertariisillugit suliarineqartussaasunut.

Pingaartuutillugu malugisassaavoq politik-ikkut akisussaaffik nunanut allanut, sillimaniarnermut, taavalu Kalaallit Nunaata illersorneqarnissaanut suli Qallunaat Nunaata susassaqarfianimmat, taamaattumillu oqaluserisassaq manna akisussaaffeqarfiup pineqartup ataaniimmat. Aamma pingaartuusutut malugeqqunarpoq USA pingaaruteqarmat Kalaallit Nunaata ullumikkut siunissamilu illersorneqarnissaanut

Kalaallit Nunaata illesorneqarnissaanut tunngatillugu isumaqatigiissut isumaqatigiissutaavoq Qallunaat Nunaata USA-miillu ukioq 1951

Illersornissamut isumaqatigiissut 1951-imeersoq, taassumalu kingornatigut tapiutaasut isumaqatigiissummut Kalaallit Nunaata illersorneqarnissaa siunertarivaat – Kalaallit Nunaata illersorneqarnissaata saniatigut aamma kiffartuussinerit Kalaallit Nunaannut iluaqutaasussaallutik aamma.

Isumaqatigiissut kingornatigullu amerlanerit tapiutaasut isumaqatigiissummut, taakkuupput Qallunaat Nunaata USA-llu akornanni isumaqatigiissutaanikut, Kalaallit Nunaat akulerutsinneqarsimanani piffissap ilaatigut pinngorsimasut.



Kalaallit Nunaat piffissap ingerlanerani akuutinneqarnerunissamut ilungersuuteqarnikuuvoq. Kalaallit Nunatta annertunerusumik peqataatinneqarnissaanik tunngaviit isumaqatigiissutini Itilleq-erklæring 2003-immersoq aammalu Namminersorneq pillugu inatsimmi 2009-immersumiippat.

ATASSUT isumaqarpoq, isumaqatigiissutit suulluunniit nunatsinnut sammitinneqartut sunniuteqartussallu Kalaallit Nunaannut annerpaamik iluaqtissiisassasut. Taamaattumik ATASSUT-miit siunnersuummut tapersiilluarsinnaavugut, tassalu ukioq 1951 isumaqatigiissut , tassungalu tapertaassutaasut isumaqatigiissutit kingornatigut nalilersorneqarnissaat siunnersuummi anguniarneqarmat.

Taamaakkaluartoq pingaartuuvoq massakkut isumaqatigiinniarnert ingerlasut naammassineqarsimanissaat, taakkunimi angusarisimasat aamma toqqammavileeqataassammata nalilersuinissamut.

Taamaattumik ATASSUT-miit Naalakkersuisut allannguutissatut siunnersuutaannut tapersiivugut. Naalakkersuisunut noqqaassutaassaaq massakkut isumaqatigiinniarnert ingerlasut naammassissagaat, taassumalu kingorna nalilersuissasut ataatsimiitsitaliamik pilersitsisoqarnissaa pisariaqassanersoq.